

BOSNA I HERCEGOVINA

Brčko distrikt BiH

**SKUPŠTINA**

**BRČKO DISTRIKTA BiH**



БОСНА И ХЕРЦЕГОВИНА

Брчко дистрикт БиХ

**СКУПШТИНА**

**БРЧКО ДИСТРИКТА БиХ**

*Mladena Maglova 2, 76100 Brčko distrikt BiH, telefon i faks: 049/215-516*

*Младена Маглова 2, 76100 Брчко дистрикт БиХ, тел. и факс: 049/215-516*

Na osnovu člana 22 Statuta Brčko distrikta Bosne i Hercegovine – prečišćeni tekst („Službeni glasnik Brčko distrikta Bosne i Hercegovine“, broj 2/10), Skupština Brčko distrikta Bosne i Hercegovine na 56. redovnoj sjednici održanoj 14. marta 2024. godine, usvaja

**ZAKON**  
**O IZMJENAMA I DOPUNAMA KRIVIČNOG ZAKONA BRČKO DISTRIKTA**  
**BOSNE I HERCEGOVINE**

**Član 1**

U Krivičnom zakonu Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 19/20- prečišćeni tekst) u članu 2 stavovi 13, 14 i 26 mijenjaju se i glase:

„(13) Dijete je lice koje nije navršilo 18 godina života.

(14) Mlađe punoljetno lice je lice koje je u vrijeme učinjenja krivičnog djela navršilo 18 godina a nije navršilo 21 godinu života.

(26) Članovi porodice u smislu ovoga zakona jesu: bračni i vanbračni partner, njihova djeca i djeca svakog od njih, bivši bračni i vanbračni partner, njihova djeca i djeca svakog od njih, krvni srodnik u pravoj liniji, usvojlac i usvojenik, srodnik u pobočnoj liniji do trećeg stepena zaključno, srodnik po tazbini do drugog stepena zaključno, kao i životni partner odnosno lice koje s drugim licem živi u zajednici koja ima trajniji karakter.“

**Član 2**

U članu 9 mijenja se naziv člana i glasi:

„Isključenje primjene krivičnog zakonodavstva u Brčko distriktu BiH prema djeci koja nisu navršila 14 godina života.“

**Član 3**

U članu 16 iza stava 6 dodaje se novi stav 7 koji glasi:

„ (7) Zastarjelost za krivična djela protiv spolnog integriteta, braka i porodice, koja su učinjena na štetu djeteta, počinje teći od dana punoljetstva žrtve.“

**Član 4**

U članu 54 u stavu 5 iza riječi: „jedinstvenu kaznu“ dodaje se riječ „zatvora“.

**Član 5**

U članu 76 iza stava 2 dodaje se novi stav 3 koji glasi:  
„(3) Učiniocu krivičnog djela učinjenog na štetu spolnog integriteta djeteta izriče se mjera bezbjednosti zabrane potpunog vršenja poziva, djelatnosti ili dužnosti, pri čijem obavljanju se ostvaruje neposredni kontakt sa djecom.“

Dosadašnji stavovi 3 i 4 postaju stavovi 4 i 5.

### **Član 6**

U članu 125 stav 4 mijenja se i glasi:

„(4) Osuda na kaznu dugotrajnog zatvora i osuda za krivična djela spolnog zlostavljanja i iskorištavanja djeteta se ne briše.“

### **Član 7**

U članu 125a iza stava 3 dodaju se novi stavovi 4 i 5 koji glase:  
„(4) U okviru kaznene evidencije vodi se poseban registar lica koja su pravosnažno osuđena za krivična djela učinjena na štetu spolnog integriteta djeteta.  
(5) Sadržaj i obim podataka iz posebnog registra iz stava 1 ovog člana, njihovo čuvanje kao i uslovi za davanje podataka regulisat će se posebnim propisom.“

### **Član 8**

Član 160 se briše.

### **Član 9**

U članu 163 stavu 2 u tački 5 interpunkcijski znak tačka zamjenjuje se interpunkcijskim znakom tačka zarezom i dodaje nova tačka 6 koja glasi:  
„6) ko liši života dijete ili žensko lice za koje zna da je trudno.“

### **Član 10**

U članu 168 stavovi 1, 3 i 4 mijenjaju se i glase:

„(1) Ko protivno propisima o prekidu trudnoće trudnoj ženi s njenim pristankom započne činiti ili učini prekid trudnoće ili je podstakne ili joj pomogne učiniti prekid trudnoće, kaznit će se kaznom zatvora od tri mjeseca do tri godine.

(3) Ako je krivičnim djelom iz stava 1 ovoga člana trudna žena teško tjelesno povrijeđena, ili joj je zdravlje teško narušeno ili je prouzrokovana smrt trudne žene ili je djelo učinjeno prema djetetu, učinilac će se kazniti kaznom zatvora od jedne do deset godina.

(4) Ako je krivičnim djelom iz stava 2 ovoga člana trudna žena teško tjelesno povrijeđena ili joj je zdravlje teško narušeno ili je prouzrokovana smrt trudne žene ili je djelo učinjeno prema djetetu, učinilac će se kazniti kaznom zatvora od tri do 15 godina.“

### **Član 11**

Iza člana 170 dodaju se novi članovi 170a i 170b koji glase:

„Genitalno sakaćenje ženskih spolnih organa  
Član 170a

(1) Ko ženskom licu potpuno ili djelimično odstrani, obreže ili na drugi način učini sakaćenje vanjskih spolnih organa ili je na to navede ili joj pomogne u tome, kaznit će se kaznom zatvora od šest mjeseci do pet godina.

(2) Ako je djelo iz stava 1 ovog člana učinjeno iz mržnje ili prema djetetu ili prema članu porodice, učinilac će se kazniti kaznom zatvora od jedne do osam godina.

(3) Ako je usljed krivičnog djela iz stavova 1 i 2 ovog člana nastupila smrt ženskog lica, učinilac će se za krivično djelo iz stava 1 ovog člana kazniti kaznom zatvora od dvije do 12 godina a za krivično djelo iz stava 2 ovog člana kaznom zatvora od tri do 15 godina.“

Prisilna sterilizacija  
Član 170b

(1) Ko na drugom licu učini operaciju u svrhu onemogućavanja prirodne reprodukcije bez pristanka tog lica, kaznit će se kaznom zatvora od jedne do osam godina.

(2) Ako je djelo iz stava 1 ovog člana učinjeno iz mržnje ili prema djetetu ili članu porodice, učinilac će se kazniti kaznom zatvora od jedne do deset godina.

(3) Ako je uslijed djela iz stava 1 ovog člana nastupila smrt lica, učinilac će se kazniti kaznom zatvora od tri do 15 godina.“

**Član 12**

Iza člana 173 dodaje se novi član 173a koji glasi:

„Proganjanje  
Član 173a

(1) Ko uporno i kroz duže vrijeme prati ili uhodi drugo lice ili s njim neposredno ili preko trećeg lica nastoji uspostaviti ili uspostavlja neželjeni kontakt ili ga na drugi način zastrašuje i time kod njega izazove tjeskobu ili strah za njegovu bezbjednost ili bezbjednost njegovog člana porodice kaznit će se novčanom kaznom ili kaznom zatvora do jedne godine.

(2) Ako je djelo iz stava 1 ovog člana učinjeno u odnosu na člana porodice ili prema djetetu, učinilac će se kazniti kaznom zatvora do tri godine.“

**Član 13**

U članu 177 u stavu 2 riječi „ili maloljetniku“ se brišu.

#### **Član 14**

Iza člana 178 dodaje se novi član 178a koji glasi:

##### **„Psihičko nasilje Član 178a**

(1) Ko zlostavlja drugog ili prema njemu postupi na način kojim se vrijeđa ljudsko dostojanstvo i time naruši njegov psihički integritet, kaznit će se novčanom kaznom ili kaznom zatvora do jedne godine.

(2) Ako je djelo iz stava 1 ovog člana učinjeno prema djetetu, učinilac će se kazniti kaznom zatvora od šest mjeseci do pet godina.“

#### **Član 15**

U članu 180 stav 3 se briše.

#### **Član 16**

U članu 186 stav 3 mijenja se i glasi:

„(3) Predmeti koji su bili namijenjeni ili upotrijebljeni za učinjenje krivičnog djela iz stavova 1 i 2 ovoga člana i predmeti koji su nastali učinjenjem tih krivičnih djela oduzet će se.“

Stav 4 se briše.

#### **Član 17**

Iza člana 186 dodaje se novi član 186a koji glasi:

##### **„Zloupotreba snimka spolno pornografskog sadržaja Član 186a**

(1) Ko zloupotrijebi odnos povjerenja i bez pristanka snimanog lica učini dostupnim trećem licu snimak spolno pornografskog sadržaja koji je snimljen uz pristanak tog lica za ličnu upotrebu i na taj način povrijedi privatnost tog lica, kaznit će se kaznom zatvora do tri godine.

(2) Kaznom iz stava 1 ovog člana kaznit će se ko upotrebom informaciono-komunikacione tehnologije ili na drugi način izradi novi ili preinači postojeći snimak spolno pornografskog sadržaja ili taj snimak upotrijebi kao pravi te time povrijedi privatnost lica na tom snimku.

(3) Ko krivično djelo iz stavova 1 i 2 ovog člana učini putem informaciono-komunikacione tehnologije ili na drugi način zbog čega je snimak postao dostupan većem broju lica, kaznit će se kaznom zatvora do tri godine.

(4) Snimci i posebni uređaji kojima je učinjeno krivično djelo iz ovog člana će se oduzeti.“

### **Član 18**

Naziv glave XIX mijenja se i glasi:

„GLAVA XIX - Krivična djela protiv spolnog integriteta.“

### **Član 19**

Član 200 mijenja se i glasi:

#### „Silovanje Član 200

(1) Ko s drugim licem bez njegovog pristanka učini spolni odnos ili s njim izjednačenu spolnu radnju ili navede drugo lice da bez svog pristanka s trećim licem učini spolni odnos ili s njim izjednačenu spolnu radnju, kaznit će se kaznom zatvora od jedne do osam godina.

(2) Ko drugo lice upotrebom sile ili prijetnje da će neposredno napasti na njegov život ili tijelo ili na život ili tijelo njemu bliskog lica prisili na spolni odnos ili s njim izjednačenu spolnu radnju, kaznit će se kaznom zatvora od tri do deset godina.

(3) Ko krivično djelo iz stavova 1 i 2 ovoga člana učini prema članu porodice ili prema djetetu starijem od 15 godina, na naročito svirep ili naročito ponižavajući način, ili iz mržnje, ili je silovano lice teško tjelesno povrijeđeno, ili mu je teško narušeno zdravlje, ili je silovano žensko lice ostalo trudno, ili ako je istom prilikom prema istoj žrtvi učinjeno više spolnih odnosa ili s njim izjednačenih spolnih radnji od više učinilaca, kaznit će se kaznom zatvora od pet do 15 godina.

(4) Ako je krivičnim djelom iz stavova 1 i 2 ovog člana prouzrokovana smrt lica prema kojem je djelo učinjeno, učinilac će se kazniti kaznom zatvora najmanje deset godina.

(5) Pristanak iz stava 1 ovog člana postoji ako je lice svojom voljom odlučilo stupiti u spolni odnos ili s njim izjednačenu spolnu radnju i bilo je sposobno donijeti i izraziti takvu odluku.“

### **Član 20**

Iza člana 200 dodaje se novi član 200a koji glasi:

„Spolno uznemiravanje  
Član 200a

(1) Ko spolno uznemirava drugo lice, kaznit će se kaznom zatvora do jedne godine.

(2) Ko djelo iz stava 1 ovog člana učini prema licu koje se prema njemu nalazi u odnosu podređenosti ili zavisnosti ili koje je posebno ranjivo zbog uzrasta, bolesti invaliditeta, trudnoće, teže tjelesne ili duševne smetnje, kaznit će se kaznom zatvora od tri mjeseca do tri godine.

(3) Spolno uznemiravanje je svako verbalno, neverbalno ili fizičko neželjeno ponašanje spolne prirode koje ima za cilj ili stvarno predstavlja povredu dostojanstva lica, koje uzrokuje strah, neprijateljsko, ponižavajuće ili uvredljivo okruženje.“

**Član 21**

Član 204 se briše.

**Član 22**

U članu 205 stav 2 se briše.

**Član 23**

Član 206 se briše.

**Član 24**

U članu 207a stav 1 mijenja se i glasi:

„(1) Ko silom ili prijetnjom upotrebe sile ili drugim oblicima prinude, otmicom, prevarom ili obmanom, zloupotrebom ovlaštenja ili uticaja ili položaja bespomoćnosti ili davanjem ili primanjem isplata ili drugih koristi kako bi privolio lice koje ima kontrolu nad drugim licem, vrbuje, preveze, prebaci, preda, proda, kupi, posreduje u prodaji, sakrije, primi ili drži drugo lice ili razmjenjuje ili prenosi nadzor nad licem u svrhu iskorištavanja ili eksploatacije njegovog rada i usluga putem prisilnog rada, vršenja krivičnog djela, prostitucije, korištenja u pornografske svrhe, ili drugog oblika seksualnog iskorištavanja, prisiljavanja na prosjačenje, služenje, uspostavljanja ropskog ili nekog sličnog odnosa, sklapanja prisilnog ili ugovorenog braka, prisilne sterilizacije, prisilne trudnoće ili vještačke oplodnje, radi oduzimanja organa ili dijelova tijela, radi korištenja u oružanim sukobima ili drugih oblika iskorištavanja, kaznit će se kaznom zatvora od najmanje pet godina.“

Stav 2 se briše.

Dosadašnji stavovi od 3 do 9 postaju stavovi od 2 do 8.

U novom stavu 2 brišu se riječi „i 2“.  
U novom stavu 5 brišu se riječi „i 2“.

## Član 25

Iza člana 207a dodaje se novi član 207b koji glasi:

### „Trgovina djecom Član 207b

(1) Ko vrbuje, preveze, prebaci, preda, proda, kupi, posreduje u prodaji, sakriva, drži ili prihvati dijete radi iskorištavanja ili eksploatacije njegovog rada, vršenja krivičnog djela, prostitucije ili drugih oblika seksualnog iskorištavanja, pornografije, prisiljavanje na prosjačenje, služenje, uspostavljanja ropskog ili nekog sličnog odnosa, prisilnog ili ugovorenog braka, prisilne sterilizacije, prisilne trudnoće, nezakonitog usvojenja ili njemu sličnog odnosa, radi oduzimanja organa ili dijelova tijela, radi korištenja u oružanim snagama ili drugih oblika iskorištavanja, kaznit će se kaznom zatvora od najmanje deset godina.

(2) Ko djelo iz stava 1 ovog člana učini primjenom sile, ozbiljne prijetnje ili drugim oblicima prinude, dovođenjem u zabludu, otmicom, ucjenom, zloupotrebom svog položaja, ovlaštenja ili uticaja, odnosa povjerenja, zavisnosti ili bespomoćnosti, teških prilika drugog, davanjem novca ili druge koristi kako bi se dobio pristanak lica koje ima kontrolu nad drugim licem, kaznit će se kaznom zatvora najmanje 12 godina.

(3) Ko koristi ili omogući drugom korištenje seksualnih usluga ili drugih vidova eksploatacije djeteta, a bio je svjestan da je riječ o žrtvi trgovine ljudima, kaznit će se kaznom zatvora od deset do 20 godina.

(4) Ko oduzme, zadržava, falsifikuje ili uništi lične identifikacione isprave radi učinjenja djela iz stavova 1 i 2 ovog člana, kaznit će se kaznom zatvora od sedam do 15 godina.

(5) Ako je djelo iz stavova 1, 2, 3 i 4 ovog člana učinjeno u sastavu organizovane kriminalne grupe, učinilac će se kazniti kaznom zatvora najmanje 12 godina.

(6) Ako djelo iz stavova 1, 2, 3 i 4 ovog člana učini službeno lice u vršenju službe, kaznit će se kaznom zatvora najmanje 12 godina.

(7) Ako je usljed djela iz stavova 1, 2 i 3 ovog člana nastupila teška tjelesna povreda, teško narušavanje zdravlja ili smrt jednog ili više lica, učinilac će se kazniti kaznom zatvora najmanje 15 godina.

(8) Pristanak djeteta na bilo koji oblik iskorištavanja iz stava 1 ovog člana ne utiče na postojanje ovog krivičnog djela.

(9) Predmeti, prevozna sredstva i objekti korišteni za učinjenje djela iz ovog člana će se oduzeti.

(10) Protiv žrtve trgovine djecom koju je učinilac krivičnog djela prinudio da učestvuje u učinjenju drugog krivičnog djela, neće se voditi krivični postupak ako je takvo postupanje bilo neposredna posljedica njenog statusa žrtve trgovine ljudima.”

Dosadašnji član 207b postaje član 207c.

## Član 26

Iza člana 207c dodaje se nova glava XIXa i novi članovi 207d, 207e, 207f, 207g, 207h, 207i, 207j, i 207k., koji glase:

## **„XIXa – GLAVA DEVETNAEST A – KRIVIČNA DJELA SPOLNOG ZLOSTAVLJANJA I ISKORIŠTAVANJA DJETETA**

### **„Spolni odnos s djetetom mlađim od 15 godina Član 207d**

(1) Ko učini spolni odnos ili s njim izjednačenu spolnu radnju s djetetom mlađim od 15 godina ili ga navede da učini spolni odnos ili s njim izjednačenu spolnu radnju s trećim licem, kaznit će se kaznom zatvora od jedne do deset godina.

(2) Ako djelo iz stava 1 ovoga člana učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojlac, staratelj, nastavnik, vaspitač, ljekar, vjerski službenik ili drugo lice kojem je dijete povjereno radi učenja, vaspitanja, čuvanja, staranja ili njege, učinilac će se kazniti kaznom zatvora od tri do 12 godina.

(3) Ako je djelo iz stava 1 ovoga člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više lica ili je usljed djela nastupila teška tjelesna povreda, teško narušenje zdravlja ili trudnoća lica prema kojoj je djelo učinjeno, učinilac će se kazniti kaznom zatvora najmanje tri godine.

(4) Ako je djelo iz stava 2 ovoga člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više lica ili je usljed djela nastupila teška tjelesna povreda, teško narušenje zdravlja ili trudnoća lica prema kojoj je djelo učinjeno, učinilac će se kazniti kaznom zatvora najmanje pet godina.

(5) Ako je usljed djela iz stavova 1, 2, 3 i 4 ovoga člana nastupila smrt djeteta, učinilac će se kazniti kaznom zatvora najmanje deset godina.

(6) Ko nad djetetom mlađim od 15 godina učini bludnu radnju ili ga navede da učini bludnu radnju s drugim licem, kaznit će se kaznom zatvora od šest mjeseci do pet godina.

(7) Ko pod uslovima iz stavova 2, 3 i 4 ovoga člana nad djetetom mlađim od 15 godina učini bludnu radnju, kaznit će se kaznom zatvora od jedne do osam godina.

(8) Učinilac koji je bio u otklonjivoj zabludi u odnosu na životnu dob djeteta iz stava 1 ovoga člana, kaznit će se kaznom zatvora od jedne do pet godina, a ako je bio u otklonjivoj zabludi u odnosu na životnu dob djeteta iz stava 6 ovog člana, kaznit će se kaznom zatvora od šest mjeseci do tri godine.

(9) Neće se kazniti učinilac za djelo iz stavova 1 i 6 ovoga člana ako razlika u dobi između lica koje vrše spolni odnos ili s njim izjednačenu spolnu radnju nije veća od tri godine.“



## Spolna zloupotreba djeteta starijeg od 15 godina Član 207e

(1) Srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojlac, staratelj, nastavnik, vaspitač, ljekar, vjerski službenik ili drugo lice koja učini obljubu ili s njom izjednačenu spolnu radnju s djetetom koje je navršilo 15 godina koje mu je povjereno na čuvanje, učenje, vaspitanje, staranje ili njegu ili ga navede da učini spolni odnos ili s njim izjednačenu spolnu radnju s trećim licem, kaznit će se kaznom zatvora od jedne do deset godina.

(2) Kaznom iz stava 1 ovoga člana kaznit će se i ko učini obljubu ili s njom izjednačenu spolnu radnju s djetetom starijim od 15 godina, iskoristivši njegovu psihičku nezrelost ili lakomislenost ili stanje nemoći ili ga navede da učini spolni odnos ili s njim izjednačenu spolnu radnju s trećim licem.

(3) Ko pod uslovima iz stavova 1 i 2 ovog člana učini bludnu radnju, kaznit će se kaznom zatvora od šest mjeseci do pet godina.

## Navođenje djece za zadovoljenje spolnih potreba Član 207f

(1) Punoljetno lice koje licu mlađem od 15 godina, koristeći kompjutersku mrežu ili drugu informacionu ili komunikacionu tehnologiju, dogovori sastanak radi vršenja obljube ili s njom izjednačene spolne radnje ili radi proizvodnje pornografskog materijala ili radi drugih oblika spolnog iskorištavanja i koje preduzme radnje da do tog sastanka dođe, kaznit će se kaznom zatvora od šest mjeseci do pet godina.

(2) Ko prikuplja, daje ili prenosi podatke o licu mlađem od 15 godina radi učinjenja krivičnog djela iz stava 1 ovoga člana, kaznit će se kaznom zatvora do tri godine.

## Zadovoljenje spolnih strasti pred djetetom Član 207g

Ko pred djetetom vrši radnje namijenjene zadovoljavanju vlastite ili tuđe spolne strasti, ili ko navede dijete da pred njim ili pred drugim licem vrši takve radnje, kaznit će se kaznom zatvora do tri godine.

## Navođenje djeteta na prostituciju Član 207h

(1) Ko radi zarade ili druge koristi dijete navodi, podstiče ili namamljuje na pružanje seksualnih usluga ili na drugi način omogući njegovu predaju drugome radi pružanja seksualnih usluga ili na bilo koji način učestvuje u organizovanju ili vođenju pružanja seksualnih usluga, a znao je ili je morao i mogao znati da se radi o djetetu, kaznit će se kaznom zatvora od jedne do osam godina.

(2) Ko koristi seksualne usluge djeteta koje je navršilo 15 godina uz davanje bilo kakve naknade ili protivusluge, a znao je ili je bio dužan i mogao znati da se radi o djetetu, kaznit će se kaznom zatvora od šest mjeseci do pet godina.

(3) Ko djelo iz stava 1 ovoga člana učini prema više lica, kaznit će se kaznom zatvora od jedne do deset godina.

#### Iskorištavanje djeteta radi pornografije Član 207i

(1) Ko navodi dijete na učestvovanje u snimanju dječje pornografije ili ko organizuje ili omogući snimanje dječje pornografije, kaznit će se kaznom zatvora od šest mjeseci do pet godina.

(2) Ko snimi, proizvede, nudi, čini dostupnim, distribuira, širi, uvozi, izvozi, pribavlja za sebe ili za drugoga, prodaje, daje, prikazuje ili posjeduje dječju pornografiju ili joj svjesno pristupa putem informaciono-komunikacionih tehnologija, kaznit će se kaznom zatvora od jedne do osam godina.

(3) Ko upotrebom sile, prijetnjom, obmanom, prevarom, zloupotrebom položaja ili teških prilika djeteta ili odnosa zavisnosti, prisili ili navede dijete na snimanje dječje pornografije, kaznit će se kaznom zatvora od jedne do deset godina.

(4) Predmeti, uređaji, sredstva, kompjuterski programi i podaci namijenjeni ili upotrijebljeni za učinjenje krivičnog djela iz stavova 1, 2 i 3 ovoga člana ili koji su nastali učinjenjem tih krivičnih djela će se oduzeti.

(5) Dijete se neće kazniti za proizvodnju i posjedovanje pornografskog materijala koji prikazuje njega lično ili njega i drugo dijete ako su oni sami taj materijal proizveli i posjeduju ga uz pristanak svakog od njih i isključivo za njihovu ličnu upotrebu.

(6) Dječja pornografija u smislu ovoga člana je materijal koji vizuelno ili na drugi način prikazuje dijete ili realno prikazano nepostojeće dijete ili lice koje izgleda kao dijete u pravom ili simuliranom spolno eksplicitnom ponašanju ili koji prikazuje spolne organe djece u seksualne svrhe.

(7) Materijali koji imaju umjetnički, medicinski ili naučni značaj ne smatraju se pornografijom u smislu ovoga člana.

#### Iskorištavanje djeteta za pornografske predstave Član 207j

(1) Ko navodi dijete na učestvovanje u pornografskim predstavama, kaznit će se kaznom zatvora od šest mjeseci do pet godina.

(2) Ko upotrebom sile, prijetnjom, obmanom, prevarom, zloupotrebom položaja ili teških prilika djeteta ili odnosa zavisnosti, prisili ili navede dijete da

učestvuje u pornografskoj predstavi, kaznit će se kaznom zatvora od dvije do deset godina.

(3) Ko zarađuje od pornografskih predstava u kojima učestvuje dijete ili na drugi način iskorištava dijete za pornografske predstave, kaznit će se kaznom zatvora od jedne do deset godina.

(4) Kaznom zatvora iz stava 1 ovoga člana kaznit će se ko posjećuje pornografsku predstavu ako je znao ili je morao i mogao znati da u njoj učestvuje dijete.

(5) Predmeti, uređaji, sredstva, kompjuterski programi i podaci namijenjeni ili upotrijebljeni za učinjenje krivičnog djela iz stavova 1, 2, 3 i 4 ovoga člana ili koji su nastali učinjenjem tih krivičnih djela će se oduzeti.

(6) Pornografska predstava u smislu ovoga člana je prikazivanje uživo ili putem komunikacionih sredstava pravog djeteta ili realno prikazanog nepostojećeg djeteta ili lica koje izgleda kao dijete u pravom ili simuliranom spolno eksplicitnom ponašanju ili spolnih organa pravog djeteta, realno prikazanog nepostojećeg djeteta ili lica koje izgleda kao dijete u spolne svrhe.

#### Upoznavanje djeteta s pornografijom Član 207k

(1) Ko djetetu mlađem od 15 godina proda, pokloni, prikaže ili javnim izlaganjem posredstvom kompjuterskog sistema, mreže ili medija za čuvanje kompjuterskih podataka ili drugih vidova komunikacije ili na drugi način učini dostupnim spise, slike, audio-vizuelni materijal ili druge predmete pornografskog sadržaja ili mu prikaže pornografsku predstavu, kaznit će se kaznom zatvora od šest mjeseci do tri godine.

(2) Predmeti, uređaji, sredstva, kompjuterski programi i podaci namijenjeni ili upotrijebljeni za učinjenje krivičnog djela iz stava (1) ovoga člana ili koji su nastali učinjenjem krivičnog djela će se oduzeti.

(3) Pornografijom u smislu ovoga člana se smatra materijal koji vizuelno ili na drugi način prikazuje lice u pravom ili simuliranom spolno eksplicitnom ponašanju ili koji prikazuje spolne organe ljudi u spolne svrhe.

(4) Materijali koji imaju umjetnički, medicinski ili naučni značaj ne smatraju se pornografijom u smislu ovoga člana.“

#### **Član 27**

Članovi 208 (Iskorištavanje djeteta ili maloljetnika radi pornografije), 209 (Upoznavanje djeteta s pornografijom) i 210 (rodoskrvnuće) se brišu.

#### **Član 28**

Naziv glave XX mijenja se i glasi:

„GLAVA XX- Krivična djela protiv braka i porodice“.

### **Član 29**

Iza člana 212 dodaje se novi član 212a koji glasi:

„Prisilno sklapanje braka  
Član 212a

(1) Ko upotrebom sile ili prijetnjom prisili drugo lice da zaključi brak, kaznit će se kaznom zatvora od šest mjeseci do pet godina.

(2) Ko radi učinjenja djela iz stava 1 ovoga člana drugo lice odvede u inostranstvo ili je u istom cilju navede da ode u inostranstvo, kaznit će se kaznom zatvora do tri godine“.

### **Član 30**

Član 213 mijenja se i glasi:

„Vanbračna zajednica s djetetom koje nije navršilo 16 godina  
Član 213

(1) Punoljetno lice koje vanbračno živi s djetetom koje nije navršilo 16 godina života, a time ne čini neko drugo krivično djelo za koje je propisana teža kazna, kaznit će se kaznom zatvora do tri godine.

(2) Kaznom iz stava 1 ovoga člana kaznit će se ko djetetu koje nije navršilo 16 godina života omogući vanbračni život s drugim licem ili ga na to navede, a time ne čini neko drugo krivično djelo za koje je propisana teža kazna.

(3) Ko krivično djelo iz stava 2 ovoga člana učini iz koristoljublja, kaznit će se kaznom zatvora od šest mjeseci do pet godina.

(4) Ako se brak zaključi, gonjenje se neće preduzeti, a ako je preduzeto, obustavit će se.“

### **Član 31**

Član 214 mijenja se i glasi:

„Oduzimanje djeteta  
Član 214

(1) Ko dijete protivpravno oduzme roditelju, usvojiocu, staraocu ili licu kome je povjereno ili ustanovi kojoj je povjereno ili ko ga protivpravno zadržava ili sprečava da bude s licem koje ima to pravo ili ko onemogućuje izvršenje izvršne odluke o staranju prema djetetu, kaznit će se kaznom zatvora do tri godine.

(2) Ako je krivičnim djelom iz stava 1 ovoga člana dijete napustilo područje Bosne i Hercegovine, učinilac će se kazniti kaznom zatvora od tri mjeseca do pet godina.

(3) Učinilac koji dobrovoljno preda dijete, može se osloboditi kazne.“

### **Član 32**

U članu 216 u nazivu člana i stavovima 1 i 2 riječi: „ili maloljetnika“ se brišu.

U stavu 3 riječi: „ili maloljetnik“ se brišu.

### **Član 33**

Iza člana 216 dodaje se novi član 216a koji glasi:

„Povreda privatnosti djeteta  
Član 216a

(1) Ko iznese ili prenese nešto iz ličnog ili porodičnog života djeteta ili suprotno propisima objavi djetetovu fotografiju ili otkrije identitet djeteta i time kod djeteta stvori stanje uznemirenosti ili ga izloži poruzi vršnjaka ili drugih lica ili na neki drugi način ugrozi dobrobit djeteta, kaznit će se novčanom kaznom ili kaznom zatvora do jedne godine.

(2) Ko djelo iz stava 1 ovoga člana učini putem sredstava masovne komunikacije, kompjuterskog sistema ili mreže, na javnom skupu ili na drugi način, zbog čega je ono postalo dostupno većem broju lica, kaznit će se novčanom kaznom ili kaznom zatvora do tri godine.

(3) Ko djelo iz stavova 1 i 2 ovoga člana učini kao službeno lice ili u obavljanju profesionalne djelatnosti, kaznit će se novčanom kaznom ili kaznom zatvora do tri godine.“

### **Član 34**

U članu 218 stavu 1 iza riječi „porodice“ dodaju se riječi: „ili mu nanosi ekonomsku štetu,“.

U stavu 3 riječi: „maloljetnikom ili se brišu“.

U stavu 4 riječi „ili maloljetniku se brišu.“

### **Član 35**

Iza člana 218 dodaje se novi član 218a koji glasi:

„Rodoskrnuće  
Član 218a

Ko učini spolni odnos ili s njim izjednačenu spolnu radnju s krvnim srodnikom u pravoj liniji ili s bratom ili sestrom, kaznit će se kaznom zatvora od šest mjeseci do pet godina.“

**Član 36**

Član 219 mijenja se i glasi:

„Povreda dužnosti izdržavanja  
Član 219

(1) Ko ne izdržava lice koje je po zakonu dužan da izdržava, a ta dužnost je utvrđena izvršnom sudskom odlukom ili izvršnim poravnanjem pred sudom ili drugim nadležnim organom i to na način, u visini i u rokovima kako je to odlukom odnosno poravnanjem utvrđeno, kaznit će se novčanom kaznom ili kaznom zatvora do dvije godine.

(2) Ako su usljed djela iz stava 1 ovog člana nastupile teške posljedice za izdržavano lice, učinilac će se kazniti kaznom zatvora do tri godine.

(3) Pri izricanju uslovne osude sud može učiniocu odrediti obavezu da izmiri dospjele obaveze i da uredno daje izdržavanje.

(4) Neće se kazniti učinilac djela iz stava 1 ovog člana ako iz opravdanih razloga nije davao izdržavanje.“

**Član 37**

U članu 220 riječ: „maloljetnika“ zamjenjuju se riječju: „djeteta“.

**Član 38**

Član 231 mijenja se i glasi:

„Služenje alkoholnih pića djetetu  
Član 231

Ko u ugostiteljskom objektu ili drugom objektu u kojem se prodaju alkoholna pića posluži djetetu žestoko alkoholno piće ili ga posluži drugim alkoholnim pićem u količinama koje mogu izazvati pijanstvo djeteta, kaznit će se novčanom kaznom ili kaznom zatvora do šest mjeseci.“

**Član 39**

U članu 233 stavu 2 riječ: „maloljetniku“ se briše.

**Član 40**

U članu 339 stavu 4 riječi „ili maloljetniku“ se brišu.

#### **Član 41**

Iza člana 355 dodaje se novi član 355a koji glasi:

„Javno izazivanje i podsticanje nasilja i mržnje

#### **Član 355a**

(1) Ko putem štampe, radija, televizije, kompjuterskog sistema ili društvene mreže, na javnom skupu ili javnom mjestu, ili na drugi način javno poziva, izaziva, ili podstiče ili učini dostupnim javnosti letke, slike ili neke druge materijale kojima se poziva na nasilje ili mržnju usmjerenu prema određenom licu ili grupama zbog njihove nacionalne, rasne, vjerske ili etničke pripadnosti, boje kože, spola, seksualnog opredjeljenja, invaliditeta, rodnog identiteta, porijekla ili kakvih drugih osobina, kaznit će se novčanom kaznom ili kaznom zatvora do tri godine.

(2) Ko krivično djelo iz stava 1 ovoga člana učini prinudom, zlostavljanjem, ugrožavanjem sigurnosti, izlaganjem poruzi nacionalnih, etničkih ili vjerskih simbola, oštećenjem tuđih stvari, skrnavljenjem spomenika, spomen-obilježja ili grobova, kaznit će se kaznom zatvora od jedne do pet godina.

(3) Ako je usljed djela iz stavova 1 i 2 ovog člana došlo do nereda, nasilja ili drugih teških posljedica za zajednički život naroda i ostalih koji žive u Brčko distriktu BiH, kaznit će se kaznom zatvora od jedne do osam godina.

(4) Materijali i predmeti koji nose poruke iz stava 1 ovog člana kao i sredstva za njihovu izradu, umnožavanje ili rasturanje oduzet će se."

#### **Član 42**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-1452/24  
Brčko, 14. 3. 2024. godine

PREDSJEDNIK  
SKUPŠTINE BRČKO DISTRIKTA BiH  
Mr. sci. Siniša Milić